

A Tx'an

IS BABEL CARTA SAN JUAN

Yabixal Cham Ak'om K'inalej

1 ¹Ti chi co tz'ibejtok ayex is yabixal Cham chi yik K'anej Ak'om K'inalej. A yet c'amto yulyibank'inal ti', ayxac'alta' Cham. Max jab k'anjab. Max jil wal oc yin on. Max con oc t'anan yin, max con oc c'apax mitx'an yin. ²A Cham Aj K'inalej tu' max tx'oxlay ajok, cax max jilon oc yin on, xan chi jak' co ba testigoal yin, cax chi jalon e yabej, tol a Cham chi ak'on co k'inal tol ayc'al yin tojbalk'inal. A Cham tu', ayc'alta' ec' yetok co Mam Dios, palta max tx'oxlay el Cham ayon. ³Xan a Cham max jil on tu', c'al max jab k'anjab tu', a' chi jalil ayex, yet watx' watx'xac'al jak'oni. Yujtol wal yel, watx'xac'al jak'on yetok co Mam Dios, c'al yetok Jesucristo is C'ajol. ⁴Yuj tu' xan chi co tz'ibejtok juntzan ti' ayex, yet watx' chi texac'al aj can co tzalojc'ulal.

A Dios axca tol sakk'inal yayji, yujtol watx' is nabal

⁵Ok jaltok e yabej, tzet albilcan yuj Jesucristo ayon. Max yalcanok, tol a Dios, sakk'inal yayji, cax c'am jabok k'ekk'inal yin. ⁶Ta chi jala' tol watx' jak'on yetok Cham, palta k'ekk'inalc'al pax yayji co nabal, toc'al chi jal chi yal tu', cax man yelok co beybal tu'. ⁷A Dios sakk'inal yayji. Ta a sakk'inal tu' chi co beybalnej, cax ta watx'c'al jak'on junjun on, axa chiq'uil Jesucristo is C'ajol, a' chi sakbanen el masanil co yobtakil jin.

⁸Ta chi jala' tol c'am co yobtakil, ayonc'al oc chi jetnej co ba, yujtol man yelok chi jala' tol c'am co yobtakil. ⁹Ta chi jalajtek co yobtakil bay Dios, chi joc'ay Cham co yobtakil tu' jiban, cax chi yion c'apax el Cham masanil tzet man watx'ok jin. Yujtol tojol ton Cham, cax chic'al yun bay chi yala'. ¹⁰Ta chi jala' tol c'am bay chi oc jabok co yobtakil, axca tol chi jut Dios yin lek'tial, cax man lananok jaon oc co c'ul yin is k'anej.

A Cristo chi aon oc co ti' bay Dios

2 ¹Ex axca tol wuninal e yayji, chin tz'ibejtok juntzan ti' ayex, yet watx' manchakxa e yun yobtakil xin. Palta ta c'uxan ay bay chi jun junok yobtakil, ay jun chi aon oc co ti' bay co Mam Dios, a ton Jesucristo. A Cham, a caw wal tol watx' ton Cham. ²Axca wal junok xajanbal, axca tu' max yun cam Cristo tojolak co yobtakil. Man asannejok yuj co yobtakil ayon ti', xan max cami, palta yuj is yobtakil masanil anima bay yulyibank'inal ti', xan max cami.

³Ta chi jikej tzet chi cheklay co beybalnej yuj Dios, tita' tol jojtakxa Dios sic'libil chi yal tu'. ⁴Ta chi jala' tol jojtakxa Dios, palta c'am chi jikej pax tzet chi cheklay co beybalnej, lek'ti on chi yal tu', cax c'am jabok yel ayoc jin. ⁵Ta chi jikej tzet chi al-lay xin, wal yel ay ton wal co camc'ulal yin Cham sic'libil. Axca ton ti' chi yun jojtaknen elok, tol ayon ton oc yin Cham. ⁶Ta ayon chi jala': Ayin ti', ay in oc yin Cristo, ta con chi, yowalil chi co beybalnej beybal Cham.

Jun chekbanilej caw wal miman yelapnok

⁷Ex wux'tak, ex wanab, a jun chekbanil ok waltok ayex ti', man aokto tinani' ok e yabey, yujtol a jun chekbanil ti', albilxa ayex yettaxc'al max ex oc yetok Dios. E yabnakxa jun chekbanilej ti' yet payxa, tol yowalil chi co camc'ulnelej co ba. ⁸Palta chi waltok jun chekbanil ti' ayex junelxa. Lanan co beybalnen jun chekbanilej axca max yut beybalnen Jesucristo, yujtol lanan yel k'ekk'inal jin. Axa acaw sakk'inal ayoc jin.

⁹Ta chi jala' tol sakk'inalxa yayji co nabal, palta cac'al ti' pax chichon oc co c'ul yin junok juxtak ma yin junok janab, k'ekk'inalto yayji co nabal chi yal tu'. ¹⁰Ta ay co camc'ulal yin eb juxtak c'al yin eb janab, ti tol sakk'inalxa yayji co nabal chi yal tu', xan c'am junok tzet ayoc jin tol chon ak'on ayc'ayok. ¹¹Axa eb cac'al ti' chichon oc c'ul yin junok juxtak xin, ma yin junok janab, k'ekk'inalto yayji is nabal eb. Axca wal junok mac chi bey xol k'ekk'inal, cax c'am chi yil bay chi ca toji, cay wal tu' eb, yujtol etaxnak el is nabal eb.

¹²Ex ac' creyente, chin tz'ibejtok juntzan ti' ayex, yujtol a Dios max jooncan c'ay e yobtakil yuj Jesucristo. ¹³Ex icham creyentexa, chin tz'ibej c'apaxtok ayex yujtol e jojtakxa Cham ayxac'alta' ec' yet manto yesnej aj yulyibank'inal ti'. Ac'ala' ex creyente tec'anxa e waayi, chin tz'ibej c'apaxtok ayex, yujtol max cancan nak diablo yalan e yuj.

Ac'ala' ex ac' creyente, chin tz'ibejtok juntzan ti' ayex, yujtol e jojtakxa co Mam Dios. ¹⁴Ex icham creyentexa, chin tz'ibejtok ayex, yujtol e jojtakxa Cham ayxac'alta' ec' yet manto yesnej aj yulyibank'inal ti'. Ex creyente tec'an waayi, chin tz'ibejtok ayex, yujtol ayxa e yip yin e creyenteal, c'al chabilxa k'anej Dios e yuj wetok, cax max cancan nak diablo yalan e yuj.

¹⁵C'amokab co camc'ulnejek co ba yetok yulyibank'inal ti', tamwal yetok juntzan tzetak yetal ay bay yulyibank'inal ti'. Ta chi co camc'ulnelej co ba yetok, c'amxa co camc'ulal yin co Mam Dios chi yal tu'. ¹⁶A eb yet

yulyibank'inal ti', asan yet is mimanil eb chi yochej ocok, cax chi yochen c'apax oc eb tzetac yetal chi yil is sat, cax chi say eb mimanbilal. Palta a juntzan beybalej tu', man yetok co Mam Dios, palta tol yet yulyibank'inal ti'. ¹⁷A yulyibank'inal ti', c'al masanil yob yochwan eb anima, lanan lajwi ec'ok, palta tatol chi jun yochwan Dios, iquis onc'al yin tojbalk'inal.

Eb ok yaloc ba Cristoal

¹⁸Ex came'ulnebil wuj, lajubxac'al tiempo bay ayon ec' ti'. Max jabej tol a nak ajc'ul yin Cristo, ok tx'oxaj ba nak. A tinani', xiwilxa eb ajc'ul yin Cristo mayal tx'oxaj ba. Yuj tu' xan jojtakxa, tol lajubxa tiempo bay ayon ec' ti'. ¹⁹A co xol max el eb ajc'ul yin Cristo, yujtol manc'alta' jetbiok eb. K'inalok ta caw wal jetbi eb, toc'alta' max ayjic'al ec' eb jetok, palta max el eb, yet watx' chi txeclaj elok tol manc'alta' jetbiok eb.

²⁰A pax ex ayex ti xin, max yak' Cristo Cham Espíritu Santo ayex jetok. Yuj tu' xan jojtak co masanil jun cuybej acaw yel. ²¹C'am junok ex tol man e yojtakok jun cuybej yel tu'. Yuj tu' xan chin tz'ibejtak ayex. E yojtakxa c'apaxok, tol c'am junok lek'tial xol jun cuybej acaw yel tu'.

²²Chi waltok e yabej mactak txel chi ak'on lek'tial: A eb chi aloni tol a Jesús man Cristook, chi yal elapnok tol man chekbiloktek Cham yuj Dios, a eb tu' ajc'ul yayji oc eb yin Cristo, yujtol a yet chi yintaknen el eb Cham C'ajolej, chi yintaknej c'apax el eb Cham Mamej. ²³Tzanc'al mac chi aloni tol a Jesucristo man C'ajolok Dios, c'am oc Dios yin eb. A pax eb chi alon xin, tol C'ajol ton Dios Cham, ay ton oc Dios yin eb.

²⁴Yuj tu' xan a jun cuybej max jab yettax max on oc yetok Dios, yowalil asan chi jaocc'al yin co c'ul. Ta caywal tu' chi jut jaon oc yin co c'ul, ok on ayjokc'al ec' yin co Mam Dios, cax ok on yaon c'apax oc yin is C'ajol.

²⁵Max yak'can Jesucristo is ti' ayon, tol ok yak' co k'inal tol ayc'al yin tojbalk'inal.

²⁶Ti chi waltok e yab yuj juntzan eb chi ochen chex etneni, xan chin tz'iblitok ayex. ²⁷Max yak' Jesucristo Cham Espíritu Santo ayon junjun on. Yuj tu' xan man yowalilok tol tx'okto wal junok anima chon cuyoni, yujtol a Cham Espíritu tu' chon cuyon yin masanil tzet yetal. A cuybanilej chi yak' ayon, yelc'al elok, c'am junok lek'tial aytok xol. Yuj tu', ayjanekc'al ec' yin Cristo, yujtol caytu' yalon Cham Espíritu ayon.

²⁸A tinani', ex came'ulnebil wuj, yowalilokab ayonc'al ec' yin Cristo, yet watx' c'am on chon xiwaj yet ok jayok, cax c'am chon q'uixwi aj satak, yet ok jay tu'.

²⁹Jojtakxa tol caw wal watx' ton Jesucristo. Yuj tu', tix wal chi yun nachaj el juj ti', tatol watx' chi jut co beybal axca ton Cham tu', yuninal onxa Dios chi yal tu'.

Yuninal onxa Dios

3 ¹Ilab wali, caw wal chon is came'ulnej co Mam Dios, ilab tol chon yaloc yuninalok. Yel toni, yuninal onxa. A eb yet yulyibank'inal ti',

c'am chi nachaj el yuj eb, tatol yuninal onxa Dios, yujtol man yojtakok eb Dios. ²Ex wuxtak, ex wanab came'ulnebil wuj, yuninal onxa Dios tinani'. Palta manto txequelok tzetbil ok yun jelocok. Palta jojtak tol a yet ok jay Jesucristo, lajanxa ok jun axca Cham, yujtol ok jiloc tzetbil yili. ³Co masanil on chi jaoc yipok co c'ul tol axca tu' ok yunej, lanan wal co watax'nen oc co beybal, yet watax' caw wal watax' on axca Jesucristo.

⁴A mac chi beybalnen yobtakil, man lananok yiken chekbanil Dios. Yujtol a mac c'am chi iken juntzan chekbanil tu', a yobtakil chi el yuneni. ⁵Jojtakxa, tol yuj yion el Jesucristo co yobtakil, xan max ulic' bay yulyibank'inal ti'. C'am jabok yobtakil yin Cham. ⁶Yuj tu xin, ta yel wali ayon oc yin Cham, manchakxa co beybalnej yobtakil. Palta tzanc'al mac ac'ala' beybalnen yobtakil xin, c'am chi yaoc nabal yin Cham, cax manto ojtakbilok Cham yuj. ⁷Ex in came'ulnebil, manchak e yak' e ba etnelay yuj junok mactxel. Tatol watax'c'al chi jut co beybal, watax' on ton axca Cristo xin, yujtol watax'c'al beybal Cham. ⁸A mac ac'ala' beybalnen yobtakil, ac'ala' yettoc'alta' nak diablo chi yal tu', yujtol a' chanej el yich yobtakil tu'. Toltax tinani', ac'ala' yunen yobtakil. Yuj tu xan max ulic' Cham C'ajol Dios bay yulyibank'inal ti', yuj ul yak'on lajwok tzet chi el yunen nak diablo tu'.

⁹Tatol yel yuninal onxa Dios, majxa co beybalnej yobtakil, yujtol a is c'ulbal Cham ayoc jin. A tinani', c'amxa chi je' co beybalnen yobtakil, yujtol yuninal onxa. ¹⁰Axca ton ti' chi yun txeclaj elok, mactak txel eb yuninalxa Dios, mactak txel eb yuninal c'apax nak diablo. Ta man watax'ok co beybal, ta c'am chi co came'ulnej eb juxtak eb janab, wal yel mayon yetok Dios chi yal tu'.

Yowalil chi co came'ulnelej co ba

¹¹A jun chekbanil ok waltok ayex ti', atax yet max ex oc yetok Dios cax max e chaon el yich e yabeni: Co came'ulnelejek co ba, xi jun chekbanil ti'. ¹²Yuj tu', maj je' caytu' chi jut co ba axca max yut ba Caín. Yet nak diablo nak Caín tu'. Yuj tu' xan max mak' cam nak tu' jun yuxtak. Yujc'al tol watax' is nabal nak yuxtak nak tu' xan max mak' camok. Axa nak xin, yob nabal nak.

¹³Ex wuxtak, ex wanab, manchak c'ayaj e c'ul yet ok chichon oc c'ul eb yet yulyibank'inal ti' e yin. ¹⁴A yet yalan ayontoc'al oc yin camich. Axa tinani' xin, jojtakxa, tol mayal ak'lay co k'inal tol ayc'al yin tojbalk'inal, yujtol ayxa co came'ulal yin eb juxtak c'al yin eb janab. Ta c'am co came'ulal yin eb, ac'ala' yet ontoc'al camich chi yal tu'. ¹⁵Ta cac'al ti' chichon oc co c'ul yin junok juxtak ma yin junok janab, mak'om cam anima on yul sat Dios. Palta jojtakxa tol c'am junok mak'om cam anima ay is k'inal tol ayc'al yin tojbalk'inal. ¹⁶Jojtak tzetbil yayji oc is came'ulal Dios jin, tol max yak' ba Jesucristo cam juj. Yuj tu', yowalil cayokab tu' chi jut co came'ulnen eb juxtak, eb janab, jak'okab co ba cam quixelok eb.

17K'inalok watx' ayon, axa chi jilon junok juxtak, ma junok janab tol ayoc yin majilal. Ta c'am tzet chi jak' pax bay, c'am jabok co came'ulal yin Dios chi yal tu'. 18Ex in came'ulnebil, c'am chi je' tol toc'al chi jala' tol aynaj co came'ulal, palta yowalil chon colwaj bay eb juxtak c'al bay eb janab. Axca ton ti' ok jut co tx'oxk'abnen elok tol yel chi jala' tol ay co came'ulal.

C'amxa xiwc'ulal eb creyente satak Dios

19Ta ay co came'ulal, jojtakxa chi yal tu', tol yet onxa jun cuybej caw yel, cax c'amxa co xiwc'ulalil satak Dios, 20caxc'al chi yal co nabal tol ay co yobtakil. Palta ec'banxa yojtaknen el Dios jintak. Yojtak masanil tzetak yetal. 21Ex wuxtak, ex wanab came'ulnebil, ta jojtak tol watx' co beybal yul sat Dios, c'am chon xiw co txajli bay, 22cax tzanc'al tzet ok co k'an bay, ok yak' ayon, yujtol lanan jiken is chekbanil, cax lanan junen masanil tzet chi cha' c'ul. 23Tixton is chekbanil ti', tol chi jaoc co c'ul yin Jesucristo is C'ajol, cax chi co came'ulnelen co ba, axca max yut yaloncan ayon. 24Ta chi jikej is chekbanil, tita' wal tol ayon oc yin Cham, cax ayoc Cham jin junjun on. Jojtak tol ayoc Cham jin, yujtol max yak' Cham Espiritu ayon.

Eb yet-xa Dios yetok eb yet yulyibank'inal ti'

4 1Ex in came'ulnebil, ta ay eb chi aloni tol yet Dios tzetak yetal chi ec' yala', man comonok che cha' e yab bay eb yin ayman. Yowalil che yak' porobal eb babelal, ta yel a Dios ayoc yetok eb. Yujtol xiwil eb lek'ti' bay yulyibank'inal ti', tol chi tz'ak yaloc ba eb chekbejok Dios. 2Ti chi waltok e yabej, tzetbil chi yun jojtaknen elok mactxel eb ayoc Cham Yespíritu Dios yin. Ta chi yal eb axca ti': Yel toni, ocnak Jesucristo animail yet max ulic' bay yulyibank'inal ti', ta xi eb, tita' tol ayoc Cham Yespíritu Dios yin eb xin. 3Palta a pax mac man cayok tu' yalon yin Jesús xin, c'am oc Cham Yespíritu Dios yin chi yal tu'. Ti tol lajan is nabal yetok nak ajc'ul oc yin Cristo. E yabnakxa, tol a nak ok oc ajc'ulal yin Cristo yowalil ok pitzc'oj ajok. A tinani' ayxa eb lajan is nabal axca ok yut ba nak chi wal tu'.

4Ex came'ulnebil wuj, yet onxa Dios tinani'. Cannakxacan eb lek'ti' tu' yalan juj. Yujtol a Cham ayoc jin, ec'ban is yipal yintak jun ayoc yin eb yet yulyibank'inal ti'. 5A eb tu', yetc'al yulyibank'inal ti' yayji eb. Yuj tu' xan asan tzet yetal yet yulyibank'inal ti' chi yal eb. Xiwil anima chi yacbj txiquin yabxalwi bay eb, yujtol yettoc'al yulyibank'inal ti' yayji eb yetok eb. 6Palta ayon ti xin, yet onxa Dios. Yuj tu' xan a mac yet-xa Dios jetok, chi yacbj eb txiquin yin tzet chi jala'. Axa eb man yetok Dios xin, tok chi yacbj eb txiquin yin tzet chi jal bay. Axca ton tu' chi yun jojtaknen elok mactxel eb ayoc Cham Espiritu yin, a ton Cham yel chi yala', c'al mactxel eb tol a lek'ti' espíritu ayoc yin.

A Dios came'ulal toni

⁷Ex wux'tak, ex wanab came'ulnebil, co came'ulnelejek co ba, yujtol a jun came'ulal tu', a bay Dios chi tita. Ta ay co came'ulal, tita' tol yuninal onxa Dios, cax jojtakxa Cham chi yal tu'. ⁸Ta c'am co came'ulal, manto jojtakok Dios chi yal tu', yujtol ayc'alta' is came'ulal Dios. ⁹Ilab tol max tx'ox Cham is came'ulal ayon, yin chekontek jun c'otan is C'ajol cam bay yulyibank'inal ti', yuj yak'oncan co k'inal tol ayc'al yin tojbalk'inal. ¹⁰A is came'ulal tu', acaw came'ulal toni, yujtol mayonnak max babji co tx'oxon co came'ulal bay Cham, palta tol a Cham max babji tx'oxon came'ulal ayon. Max chektek is C'ajol, ul yak'on cam ba tojolak co yobtakil.

¹¹Ex wux'tak, ex wanab came'ulnebil, tix ton max con yut came'ulnen Dios ti'. Yuj tu', yowalil chi co came'ulnelejek co ba c'apaxok. ¹²Caxc'al mi c'amto junok chi ilon yin Dios junelok, palta ta chi co came'ulnejek co ba, cajan oc Cham jin chi yal tu', cax chic'al yi yip is came'ulal tu' jin. ¹³Yuj Cham Yesp'iritu max cajbaj oc jin, xan jojtak tol ayon ton oc yin Cham, cax ay c'apax oc Cham jin junjun on. ¹⁴Jilnak on Cham C'ajol Dios, yuj tu' xan chi jak' co ba testigoal yin, tol a co Mam Dios cheknejek is C'ajol tu', yuj con ul coloncan el bay yulyibank'inal ti'. ¹⁵A mac chi alon axca ti': A Jesucristo C'ajol ton Dios, ta xi, ti tol ayoc yin Dios chi yal tu', cax ay c'apax oc Dios yin.

¹⁶Chi jaoc yin co c'ul, tol a Dios chon is came'ulnej. Caw wal jojtak jun ti' sic'libil. A Dios ayc'alta' is came'ulal, yuj tu' xan ta ay co came'ulal ayon ti', tita' tol ayon oc yin Cham chi yal tu', cax ay c'apax oc Cham jin. ¹⁷Cay ton ti' chi yun tz'aknajxac'al el co came'ulal, yet wata' a yet ok jay jun c'ual beyc'ulal, c'am chon xiwaj satak Dios. Yujtol axca is beybal Cristo, caytu' max jut co beybal bay yulyibank'inal ti'. ¹⁸Ta yel wali ay co came'ulal, c'amxa chon xiwi. A mac tz'akanxa is came'ulal yin Dios, c'amxa chi xiwi. Yujtol a yet chon xiwi, chi yal elapnok tol chon xiw bay yailal ok jay yuj yowal c'ul Dios. Yuj tu', a eb chito xiwi, c'amto chi tz'aknaj el is came'ulal eb chi yal tu'.

¹⁹Ay co came'ulal yin Dios tinani', yujtol a Cham max babji on is came'ulneni. ²⁰K'inalok ta chi jala', tol lanan co came'ulnen Dios, palta chi chichon pax oc co c'ul yin junok jet animail, lek'ti' on chi yal tu'. Ta c'am chi co came'ulnej eb jet animail tol chi jiloc yin tu', ¿tzet wal ok jut co came'ulnen Dios tol c'am chi jiloc yin? ²¹A Cristo ak'nejcán jun chekbanilej ti' ayon, cax chi yalon axca ti': A eb chi came'ulnen Dios, yowalil chi came'ulnej pax ba eb yetok yet animail, xi.

Chi je' jak'on ayc'ay masanil tzet man wata'ok

5 ¹A' ayon chi jaoc yin co c'ul tol a Jesús, a ton Cristo, ayon ton yuninal onxa Dios. K'inalok tinani', ta chi co came'ulnej junok mamej, chi co came'ulnej c'apax eb is yuninal. ²Yuj tu' xan jojtak,

ta lanan co came'ulnen Dios, ta lanan jiken tzet chi yala', lanan ton co came'ulnelen co ba ayon yuninal onxa ti xin. ³Ta yel wali chi co came'ulnej Dios, ok jikejlaj is chekbanil. Man yaok jiken tzet chi cheklay co beybalnej. ⁴A tzet man watx'ok bay yulyibank'inal ti', cannakxa yalan juj ayon yuninal onxa Dios ti'. Yujtol chi jaoc co c'ul yin Cham, xan chi can juntzan tu' yalan juj. ⁵Asan eb chi yaoc yin c'ul tol a Jesús C'ajol ton Dios, asan eb chi je' yak'oncan tzet man watx'ok tu' yalan.

Chi yak' ba Dios testigoal yin Jesucristo is C'ajol

⁶Ulnak ec' Jesucristo bay yulyibank'inal ti'. Ul yak'nak bautizar ba. Elnak c'apax is chiq'uul. Man asannejok tol ul yak'nak bautizar ba, palta max el c'apax is chiq'uul. Chi yak' ba Cham Espíritu testigoal tol yel ton juntzan ti'. A Cham Espíritu tu', yelc'al chi yal Cham. ⁷⁻⁸Chi yak' ba Cham Espíritu testigoal yin. Ay c'apax cabxa tzet chi yak' ba testigoal yin, a ton is bautismo, c'al is chiq'uul max eli. A oxeb ti', jun lajanc'al chalen ba yaloni tol a Jesucristo C'ajol ton Dios. ⁹Toltax chi co cha' jab tzet chi yal anima bay yulyibank'inal ti'. Akxa wal tzet chi yal Dios, yelxac'al ec'ban yelapnok. A wal caw max yak' testigoal yin is C'ajol. ¹⁰A ayon chi jaoc co c'ul yin Cham C'ajol Dios tu', lanan yalon Cham Espíritu yin janmail tol yel ton chi yal Dios yuj is C'ajol tu'. Palta a eb c'am chi yaoc c'ul yin is C'ajol xin, axca tol lek'ti Dios yul sat eb, yujtol c'am chi yaoc eb yin c'ul tzet max yal Cham yin is C'ajol. ¹¹Tixton jun yalnakan Dios ti', tol chi yak' co k'inal tol ayc'al yin tojbalk'inal. A jun k'inalaj tu', a yin is C'ajol tu' ay ocok. ¹²Yuj tu', ta ayoc Cham C'ajol Dios jin, ay co k'inal yin tojbalk'inal. Axa eb c'amoc Cham yin xin, c'am is k'inal eb yin tojbalk'inal.

Jojtak tol ay co k'inal yin tojbalk'inal

¹³Chin tz'ibejtok juntzan ti' ayex che yaoc e c'ul yin Cham C'ajol Dios, yet watx' che yojtaknej elok tol ay co k'inal tol ayc'al yin tojbalk'inal.

¹⁴Yuj tu', c'am chon xiw co txajli bay Dios, yujtol jojtak tol tzanc'al tzet chi co k'an bay, ok yabej, ta a yochwan chi co k'ana'. ¹⁵Jojtak, tol chi yab Cham co txaj; yuj tu', jojtak c'apaxok tol chic'al yak' Cham tzet chi co k'an bay. ¹⁶K'inalok ta che yil junok juxtak, ma junok janab chi yun yobtakil, palta man yetok camich jun yobtakil tu', cax chex txajli yuj, okto yak' Dios is k'inal. Palta ay yobtakil tojolxac'al co cam yuj. C'am tzet chi wal ayex tol chex txajli yuj eb chi unen juntzan tu'. ¹⁷Masanil tzet man watx'ok, yobtak yul sat Dios, palta ay yobtakil c'am chon cam yuj.

¹⁸Jojtak, ta yel wali tol yuninal onxa Dios, c'amxa chi co beybalnej yobtakil, yujtol taynebil on yuj is C'ajol. Yuj tu' c'amxa chi je' on yetnen nak diablo.

¹⁹Jojtak tol yet onxa Dios, axa masanil eb yet yulyibank'inal ti', ayto oc eb yul k'ab nak diablo.

²⁰Yetok c'apaxok, jojtakxa tol max ulic' Cham C'ajol Dios. A' max jakon co nabal, yet watx' chi jojtaknej el Cham acaw Dios. Yuj tu' xan

ayonxa oc yin Cham acaw yel, a ton Jesucristo is C'ajol. A is C'ajol tu',
caw wal Dios toni. A' chi ak'on co k'inal tol ayc'al yin tojbalk'inal. ²¹Ex in
camc'ulnebil, manchak e yaoc e nabal yin tzet chi al-lay oc diosal.